

წინასიტყვაობა*

6 წლის წინ გერმანულ-ქართულმა სისხლის სამართლის ჟურნალმა დღის სინათლე იხილა მედია სამყაროში და მას შემდეგ განუწყვეტილად ამდირებს გერმანულ- და ქართულენოვან სისხლის სამართლის მეცნიერებას. უნივერსალური ხელმისაწვდომობის თვალსაზრისით ეს ელექტრონული ჟურნალი ვირტუალურია და, შესაბამისად, პოტენციურად იმყოფება მსოფლიოს ნებისმიერ ადგილას: საკმარისია ვებგვერდზე გადასვლა. ბერნდ ჰაინრიხი ამ პროექტის ერთ-ერთი შემქმნელი და მისი დიდი ხნის თანამებრძოლია. ბერლინში ყოფნის თორმეტი წლის შემდეგ, რომელთა განმავლობაშიც ის ჰუმბოლდტის უნივერსიტეტის პროფესორი იყო (2003-2015), მან თუბინგენში თან წაიღო სისხლის სამართლის ქართველ მეცნიერებთან იენაში დაწყებული მჭიდრო პროფესიული თანამშრომლობა. ამგვარად, სისხლის სამართლის სფეროში გერმანულ-ქართული თანამშრომლობა აღმოსავლეთ და დასავლეთ გერმანიიდან გავრცელდა და შენარჩუნდა კიდევ სამხრეთგერმანულ სივრცეში. ბერნდ ჰაინრიხმა 60 წლის იუბილე 2022 წლის 1 ივნისს აღნიშნა.

მას შემდეგ, რაც გასულ წელს ჰაინერ ალვარტის 70 წლის იუბილესადმი მიძღვნილი გერმანულ-ქართული სისხლის სამართლის ჟურნალის სპეციალური გამოცემა მეტად დადებითად იქნა მიღებული, რედაქტორები შეთანხმდნენ, რომ ამ წლის მე-2-მე-4 გამოცემების სტატიებისთვის მიემართათ სისხლის სამართლის იმ მეცნიერთათვის, რომლებიც ბოლო წლებში ბერნდ ჰაინრიხთან მუშაობდნენ არა მხოლოდ გერმანულ-ქართულ, არამედ სხვა პროექტების ფარგლებშიც. ალვარტისადმი მიძღვნილი ორი სპეციალური გამოცემისგან განსხვავებით, ჩვენი უმთავრესი მიზანი არ არის, გერმანულ-ქართული სისხლის სამართლის ჟურნალის კონკრეტული გამოცემა მიუძღვნათ ბატონ ჰაინრიხს; უმეტესწილად ჩვენი სურვილია, მისი იუბილეს ეს მრგვალი თარიღი მივიღოთ, როგორც შთაგონება, რათა წლის ამ გამოცემებში ძირითადი ყურადღება სწორედ მის მიერ წარმოდგენილ და

გერმანულ-ქართულ თანამშრომლობაში წამოჭრილ თემებს დავუთმოთ.

ბერნდ ჰაინრიხის კვლევის სფერო მოიცავს თითქმის „სრულ სისხლის სამართლის მეცნიერებას“. აქედან გამომდინარე, გერმანულ-ქართული სისხლის სამართლის ჟურნალის წლევანდელი გამოცემებიც საინტერესო სისხლისსამართლებრივი თემების მრავალფეროვან სპექტრს შეეხება. წლევანდელი აქცენტი იუბილარის საქმიანობაზე არ უკავშირდება მხოლოდ თემატურ მიმართულებას; ბერნდ ჰაინრიხი (ისე, როგორც სხვები რედაქტორთა წრიდან) მხარს უჭერს (სისხლის)სამართლებრივი თანამშრომლობის ორმხრივ პროექტს. ამ ჟურნალის მეშვეობით წარმოებული ინსტიტუციონალიზებული დიალოგი გერმანულ და ქართულ (სისხლის) სამართლის მეცნიერებას შორის სამაგალითოა სისხლის სამართლის არაერთი გერმანელი და ქართველი მეცნიერისათვის, რომელთაც სურთ, დამყარდეს მეცნიერული კავშირები დასავლეთსა და აღმოსავლეთს შორის და ამ გზით საქართველო კიდევ უფრო მეტად დაახლოვდეს ევროკავშირთან.

უკრაინაში მიმდინარე საზარელი ომი ცალსახად აჩვენებს, რომ ყოფილ საბჭოთა ქვეყნებს, რომლებმაც სამი ათწლეულის წინ საბოლოოდ აღიდგინეს დამოუკიდებლობა და, მეტიც, ასოცირების ხელშეკრულების მეშვეობით მჭიდრო კავშირებს ექებენ ევროპასთან, ევროკავშირსა და ნატოში წარმატებულ განწევრიანებამდე ნებისმიერ დროს ემუქრებათ რუსეთის გაფართოების ფანტაზიები. ამის მიზეზი (როგორც ბოლო დროს გერმანიაში შეინიშნება) მათ შორის, ის არის, რომ ყოფილი ე. წ. „აღმოსავლეთ ბლოკის“ სახელმწიფოები, როგორც არის, მაგალითად, უკრაინა რუსეთის დასავლეთით, ხშირად სათანადოდ არ აღიქმებოდნენ მათი დამოუკიდებელი ისტორიული და სამართლებრივ-კულტურული განვითარების გადმოსახედიდან. ორმხრივი პროექტები აძლიერებენ ურთიერთაღქმას და პატივისცემას მონაწილე პარტნიორ სახელმწიფოებს შორის და იძლევიან ინფორმაციას ამ სახელმწიფოების ტრადიციებისა და გამოცდილების შესახებ. ეს ხელს უწყობს იმას, რომ გერმანიაში, მაგალითად, არა მხოლოდ რუსეთს, არამედ ცენტრალური და აღმოსავლეთ ევროპის სხვა ქვეყნებს (რომელთაგან ზოგიერთს რუსული

* წინასიტყვაობა გერმანულიდან თარგმნა ჟურნალის სამუშაო ჯგუფის წევრმა, აზა მორგოშიამ.

ექსპანსიონიზმი ემუქრება) სათანადოდ აღიქვამენ მათი ისტორიული მდგომარეობის გათვალისწინებით. ამრიგად, როგორც ბერლინის სისხლის სამართლისა და საერთაშორისო სამართლის ლექტორმა, ფრანც ლისტმა, 1918 წლის ზაფხულში, პირველი მსოფლიო ომის დასრულებამდე ცოტა ხნით ადრე, გერმანიის იმპერიისათვის მოხსენებაში განმარტა, თუ რატომ უნდა ყოფილიყო მაშინდელი მეფის რუსეთის იმპერიისგან გამოყოფილი საქართველო დამოუკიდებელ სახელმწიფოდ კვლავ აღიარებული, ასევე, დღევანდელი ორმხრივი პროექტები, რომლებთან კავშირშიც სამაგალითოდ აქ ბერნდ ჰაინრიხი უნდა იყოს ნახსენები, გერმანულ მხარეს ყოველ ჯერზე განსაკუთრებით უჩვენებს, თუ რა დამოუკიდებელი ტრადიცია და აქტუალური მნიშვნელობა აქვს საქართველოს, როგორც სუვერენულ სახელმწიფოს.

ამ თვალსაზრისით, გერმანულ-ქართული სისხლის სამართლის ჟურნალის 2022 წელი, რომელიც ამ გამოცემით იწყება, მათ შორის, განსაკუთრებით ემსახურება ბერნდ ჰაინრიხის წვლილის დაფასებას ამ ჟურნალის წარმატებასა და მისი დამსახურებისათვის არაერთ გერმანულ-ქართულ პროექტში, რომლებიც ხელს უწყობენ გერმანულ და ქართველ იურისტებს სამომავლოდ მეორე ქვეყნის უკეთ გაცნობაში.

გერმანულ-ქართული სისხლის სამართლის ჟურნალის გამომცემლები ვსარგებლობთ შემთხვევით და ბერნდ ჰაინრიხს ვუხდით დიდ მადლობას ქართული და გერმანული სისხლის სამართლის თანამშრომლობის სფეროში განეული ღვაწლისთვის, ხოლო 60 წლის იუბილესთან დაკავშირებით ვუსურვებთ მას ბედნიერებას, ჯანმრთელობასა და უწყვეტი შემოქმედებითობის ძალას.

გამომცემელთა სახელით:
პროფესორი, სამართლის დოქ. **მარტინ ჰეგერი**
და პროფესორი, სამართლის დოქ. **ედვარდ შრამი**